

ՀԱՍՏԱՏՎԱԾ Է  
ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱՅԻ

Նախագահության 14.11.2012թ.

N 12 (1690) որոշմամբ

ՀՀ ԳԱԱ նախագահ, ակադեմիկոս  
Բ. Մարտիրոսյան

«21» 11 2012թ.



Կազմված է 01. 11. 2012թ.  
Բաղկացած է 7 թերթից

Տպագրված է ընդամենը 5 օրինակ  
ՕՐԻՆԱԿ 1

Գ Ր Ա Ն Յ Վ Ա Մ Է

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԻՐԱՎԱԲԱՆԱԿԱՆ ԱՆՁԱՆՑ ՊԵՏԱԿԱՆ  
ՌԵԳԻՍՏՐԻ ԳՅՈՒՄՐՈՒ ՏԱՐԱԾՔԱՅԻՆ

ԲԱԺՆԻ ԿՈՂՄԻՑ 09.02.2004 թ.

գրանցման թիվ 29 210 02029

վկայական 03 Ա 063601

հարկ վճարողի հաշվառման համար  
05512119

29.09.2004թ-ին գրանցված կանոնադրության  
թիվ 1-2 փոփոխությունը գրանցված է ՀՀ ԱՆ  
իրավաբանական անձանց Պետական Ռեգիստրի  
Գործակալության տարածքային բաժնում



«20» 12 2012

Ի.Ո. ՔԵՆԵՐՔԻ

## ԿԱՆՈՆԱԴՐՈՒԹՅՈՒՆ

ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ

ԳԻՏՈՒԹՅՈՒՆՆԵՐԻ ԱԶԳԱՅԻՆ ԱԿԱԴԵՄԻԱՅԻ

«ՇԻՐԱԿԻ ՀԱՅԱԳԻՏԱԿԱՆ ԸՏՏԱԶՈՏՈՒԹՅՈՒՆՆԵՐԻ ԿԵՆՏՐՈՆ»

պետական ոչ առևտրային կազմակերպություն

(նոր խմբագրություն)

## I. ԸՆԴՀԱՆՈՒՐ ԴՐՈՒՅԹՆԵՐ

1. Հայաստանի Հանրապետության գիտությունների ազգային ակադեմիայի Շիրակի հայագիտական հետազոտությունների կենտրոն պետական ոչ առևտրային կազմակերպությունը (այսուհետ՝ Կենտրոն) շահույթ ստանալու նպատակ չհետապնդող, իրավաբանական անձի կարգավիճակ ունեցող ոչ առևտրային կազմակերպություն է, որը հանդիսանում է ԳԱԱ Հնագիտության և ազգագրության ինստիտուտի Շիրակի հոգևոր և նյութական մշակույթի հետազոտական կենտրոնի իրավահաջորդը:

2. Կենտրոնն իր գործունեության ընթացքում ղեկավարվում է Հայաստանի Հանրապետության քաղաքացիական օրենսգրքով, «Հայաստանի Հանրապետության գիտությունների ազգային ակադեմիայի մասին», «Պետական ոչ առևտրային կազմակերպությունների մասին» ու «Գիտական և գիտատեխնիկական գործունեության մասին» Հայաստանի Հանրապետության օրենքներով, այլ օրենքներով ու իրավական ակտերով, ինչպես նաև Հայաստանի Հանրապետության գիտությունների ազգային ակադեմիայի կանոնադրությամբ և սույն կանոնադրությամբ:

3. Կենտրոնի հիմնադիրն է Հայաստանի Հանրապետությունը՝ ի դեմս Հայաստանի Հանրապետության կառավարության (այսուհետ՝ հիմնադիր):

4. Կենտրոնը պատասխանատու չէ իր հիմնադրի պարտավորությունների համար: Կենտրոնի հիմնադիրը պատասխանատու չէ Կենտրոնի պարտավորությունների համար:

5. Կենտրոնն ստեղծված է համարվում նրա՝ օրենքով սահմանված կարգով պետական գրանցման պահից:

6. Կենտրոնը, որպես սեփականություն, ունի առանձնացված գույք և իր պարտավորությունների համար պատասխանատու է այդ գույքով, իր անունից կնքում է պայմանագրեր, ձեռք բերում ու իրականացնում գույքային և անձնական ոչ գույքային իրավունքներ, կրում պարտականություններ, դատարանում հանդես գալիս որպես հայցվոր կամ պատասխանող:

7. Կենտրոնը կարող է ունենալ Հայաստանի Հանրապետության զինանշանի պատկերով և իր հայերեն, ռուսերեն, անգլերեն անվանմամբ կլոր կնիք, դրոշմակնիք, ձևաթղթեր, խորհրդանիշ և այլ անհատականացման միջոցներ:

8. Կենտրոնն ունի ինքնուրույն հաշվեկշիռ, կարող է բանկերում (այդ թվում՝ նաև օտարերկրյա) բացել հաշիվներ՝ ինչպես ՀՀ դրամով, այնպես էլ՝ արտարժույթով:

9. Կենտրոնի անվանումն է՝

1) հայերեն լրիվ՝ «Հայաստանի Հանրապետության գիտությունների ազգային ակադեմիայի Շիրակի հայագիտական հետազոտությունների կենտրոն» պետական ոչ առևտրային կազմակերպություն.

2) հայերեն կրճատ՝ ՀՀ ԳԱԱ ՇՀՀԿ ՊՈԱԿ .

3) ռուսերեն լրիվ՝ “Ширакский центр арменоведческих исследований Национальной академии наук Республики Армения” государственная некоммерческая организация

4) ռուսերեն կրճատ՝ “ШЦАИ НАН РА” ГНО .

5) անգլերեն լրիվ՝ “Shirak’s research center for Armenian studies of the National Academy of Sciences of the Republic of Aemenian” Non-Commercial State Organization

6) անգլերեն կրճատ՝ “SRCAS of the NAC RA” NCSO.

10. Կենտրոնի գտնվելու վայրն է՝ Հայաստանի Հանրապետություն, ք. Գյումրի, 3101, Անկախության հրպ.1:

## II. ԿԵՆՏՐՈՆԻ ԳՈՐԾՈՒՆԵՈՒԹՅԱՆ ԱՌԱՐԿԱՆ ԵՎ ՆՊԱՏԱԿՆԵՐԸ

11. Կենտրոնի գործունեության առարկան և նպատակներն են՝

1) Կենտրոնի գործունեության առարկան Շիրակի նյութական և հոգևոր մշակույթի ժառանգությունն է, իսկ նպատակը՝ մասնագիտացմանը համապատասխան գիտական, գիտատեխնիկական հետազոտությունների և մշակումների, գիտակրթական աշխատանքների կազմակերպումն ու իրականացումն է գիտահետազոտական աշխատանքի հետևյալ ուղղություններով՝ պատմական Շիրակի հնագիտություն, ազգագրություն, պատմություն, բանահյուսություն, գրական և լեզվական մշակույթ, էթնոսոցիոլոգիական և էթնոմշակութային արդի գործընթացներ:

2) գիտական կադրերի պատրաստումը:

12. Կենտրոնն իր առջև դրված խնդիրները լուծելու համար Հայաստանի Հանրապետության օրենսդրությամբ սահմանված կարգով՝

1) որոշում է գիտական և գիտատեխնիկական գործունեության հիմնական ուղղություններն ու գիտահետազոտական ծրագրերը.

2) հայտարարում է մրցույթներ գիտական ստորաբաժանումների ղեկավարների և գիտական աշխատողների թափուր տեղերի համար.

3) պլանավորում և իրականացնում է գիտական կադրերի պատրաստումը, պարբերաբար (առնվազն յուրաքանչյուր հինգ տարին մեկ անգամ) անցկացնում է գիտական աշխատողների ատեստավորում.

4) հիմնադրի որոշմամբ կարող է հանդիսանալ այլ կազմակերպության հիմնադիր կամ մասնակից.

5) կազմում է իր խմբագրական-հրատարակչական գործունեության պլանները, աջակցում տպագրության համար երաշխավորված աշխատանքների հրատարակմանը:

13. Կենտրոնը կարող է մասնակցել հայրենական և միջազգային գիտական ընկերությունների ու միությունների գործունեությանը, հրավիրել միջազգային գիտաժողովներ, կազմակերպել սեմինարներ:

14. Կենտրոնը կարող է իրականացնել ձեռնարկատիրական գործունեության հետևյալ տեսակները՝

1) գիտամեթոդական, գիտակրթական և գիտատեխնիկական խորհրդատվության մատուցում.

2) մասնագիտական վերապատրաստում և վերաորակավորում.

3) գիտատեխնիկական հետազոտությունների և մշակումների իրականացում.

4) պետական առաջադրանքի կատարումից ազատ շարժական և անշարժ գույքի վարձակալության հանձնում.

5) սեփական գիտատեխնիկական մշակումների և տեխնոլոգիաների իրացում:

15. Ձեռնարկատիրական գործունեությունից ստացված շահույթն ուղղվում է Կենտրոնի կանոնադրական խնդիրների իրականացմանը:

16. Կենտրոնը կարող է լիցենզավորման ենթակա գործունեության տեսակներով զբաղվել միայն լիցենզիայի առկայության դեպքում:

### III. ԿԵՆՏՐՈՆԻ ԿԱՌԱՎԱՐՈՒՄԸ

17. Կենտրոնի կառավարումն իրականացնում են հիմնադիրը, լիազորված պետական մարմինը՝ Հայաստանի Հանրապետության գիտությունների ազգային ակադեմիան (այսուհետ՝ ակադեմիա) և գործադիր մարմինը (այսուհետ՝ տնօրեն):

18. Հիմնադրի լիազորությունները սահմանվում են «Հայաստանի Հանրապետության գիտությունների ազգային ակադեմիայի մասին», «Պետական ոչ առևտրային կազմակերպությունների մասին» Հայաստանի Հանրապետության օրենքներով և այլ իրավական ակտերով:

19. Ակադեմիան՝

1) սույն կանոնադրությամբ սահմանված կարգով իրականացնում է կառավարման մարմինների ձևավորումը և լիազորությունների վաղաժամկետ դադարեցումը.

2) իրականացնում է Կենտրոնի գործունեության վերահսկողությունը.

3) կասեցնում կամ ուժը կորցրած է ճանաչում Կենտրոնի տնօրենի՝ Հայաստանի Հանրապետության օրենսդրության պահանջներին հակասող հրամանները, հրահանգները, կարգադրությունները և ցուցումները.

4) լսում է Կենտրոնի գործունեության մասին հաշվետվություններ, քննում է դրանց գործունեության վերստուգման արդյունքները.

5) իրականացնում է վերահսկողություն Կենտրոնի ամրացված պետական սեփականության օգտագործման և պահպանության նկատմամբ.

6) իրականացնում է վերահսկողություն Կենտրոնի սեփականության պահպանության նկատմամբ, համաձայնություն է տալիս նրա գույքի օտարման կամ վարձակալության հանձնման համար.

7) հաստատում է Կենտրոնի տարեկան հաշվետվությունները և տարեկան հաշվեկշիռը.

8) ստեղծում է Կենտրոնի լուծարման հանձնաժողով և հաստատում լուծարման հաշվեկշիռը.

9) իրականացնում է հիմնադրի որոշումներով և սույն կանոնադրությամբ նախատեսված այլ գործառույթներ:

20. Կենտրոնի ընթացիկ գործունեությունը ղեկավարում է տնօրենը, որը պատասխանատու է Կենտրոնի գործունեության համար:

21. Կենտրոնի տնօրենի ընտրությունն իրականացվում է՝ համաձայն ակադեմիայի կողմից հաստատված Կենտրոնի գործադիր մարմնի (տնօրենի) պաշտոնում ընտրության մրցույթի ընթացակարգի: Տնօրենի յուրաքանչյուր թեկնածու մրցույթի մասնակցության համար ներկայացնում է Կենտրոնի զարգացման ծրագիր, իսկ ընտրվելուց հետո լիազոր մարմնի ղեկավարը մրցույթում հաղթողի հետ կնքում է պայմանագիր:

22. Կենտրոնի տնօրենը կարող է վաղաժամկետ ազատվել պաշտոնից՝ օրենքով նախատեսված դեպքերում և կարգով:

23. Կենտրոնի տնօրենը՝

1) առանց լիազորագրի հանդես է գալիս Կենտրոնի անունից, ներկայացնում է նրա շահերն ու կնքում գործարքներ.

2) Հայաստանի Հանրապետության օրենսդրությամբ, հիմնադրի և ակադեմիայի որոշումներով և սույն կանոնադրությամբ սահմանված կարգով տնօրինում է պետական կազմակերպության գույքը, այդ թվում՝ ֆինանսական միջոցները.

3) տալիս է Կենտրոնի անունից հանդես գալու լիազորագրեր, այդ թվում՝ վերալիազորման իրավունքով լիազորագրեր.

4) աշխատանքի է նշանակում և աշխատանքից ազատում Կենտրոնի աշխատողներին, նրանց նկատմամբ կիրառում է խրախուսման միջոցներ և նշանակում կարգապահական տույժեր.

5) բանկերում բացում է հաշվարկային հաշիվներ.

6) կատարում է աշխատանքի բաշխում իր տեղակալների միջև.

7) սահմանում է Կենտրոնի կառուցվածքը և կառուցվածքային ստորաբաժանումների իրավասությունները.

8) հաստատում է Կենտրոնի հիմնարկների, մասնաճյուղերի և ներկայացուցչությունների կանոնադրությունները.

9) նշանակում է Կենտրոնի հիմնարկների, ներկայացուցչությունների և մասնաճյուղերի ղեկավարներին, նրանց տալիս է համապատասխան լիազորագրեր.

10) օրենքով և սույն կանոնադրությամբ սահմանված իր լիազորությունների սահմաններում արձակում է հրամաններ, հրահանգներ, տալիս կատարման համար պարտադիր ցուցումներ և վերահսկում դրանց կատարումը.

11) իրականացնում է Հայաստանի Հանրապետության օրենսդրությանը չհակասող և Կենտրոնի կառավարման այլ մարմիններին չվերապահված այլ լիազորություններ:

24. Կենտրոնի գիտական խորհուրդը (այսուհետ՝ գիտական խորհուրդ) Կենտրոնի գիտական և գիտատեխնիկական գործունեությունը համակարգող մարմին է, որի կառուցվածքը և անդամների թիվը, տնօրենի առաջարկությամբ, հաստատում է ակադեմիայի համապատասխան բաժանմունքի բյուրոն:

25. Տնօրենի ներկայացմամբ, ինչպես նաև գիտական անձնակազմի առաջադրմամբ, Կենտրոնի առաջատար գիտնականները գիտական խորհրդի կազմում ընտրվում են գիտական անձնակազմի ընդհանուր ժողովում (համաժողովում): Գիտական խորհրդի անդամներն ընտրվում են փակ գաղտնի քվեարկությամբ՝ մասնակիցների ձայների պարզ մեծամասնությամբ: Կենտրոնում չաշխատող ճանաչված մասնագետները գիտական խորհրդի անդամ են ընտրվում տնօրենի ներկայացմամբ՝ բաց քվեարկությամբ:

26. Ի պաշտոնե և հրավիրված անդամների թիվը չպետք է գերազանցի գիտական խորհրդի անդամների թվի մեկ երրորդը:

27. Գիտական խորհրդի վերջնական կազմը հաստատում է ակադեմիայի համապատասխան բաժանմունքի բյուրոն՝ տնօրենի ընտրության օրվանից 2 ամսվա ընթացքում:

28. Կենտրոնի տնօրենն ի պաշտոնե գիտական խորհրդի նախագահն է:

29. Կենտրոնի գիտական քարտուղարն ի պաշտոնե գիտական խորհրդի քարտուղարն է:

30. Կենտրոնի գիտության գծով փոխտնօրենը և գիտական քարտուղարն ի պաշտոնե գիտական խորհրդի անդամներն են:

31. Գիտական խորհուրդն իրավասու է ընդունելու որոշումներ, եթե նիստին մասնակցում է նրա կազմի առնվազն երկու երրորդը: Գիտական խորհրդի որոշումն ընդունված է համարվում, եթե նրա օգտին քվեարկել է ներկաների կեսից ավելին: Որոշումն ընդունվում է բաց քվեարկությամբ, եթե գիտական խորհուրդը որոշում չի ընդունել փակ գաղտնի քվեարկություն անցկացնելու մասին:

32. Գիտական խորհուրդը՝

1) քննարկում և հաստատում է Կենտրոնի գիտական հետազոտությունների հիմնական ուղղությունները, գիտահետազոտական աշխատանքների թեմատիկան ու ծրագրերը, գիտական կադրերի պատրաստման, միջազգային գիտական համագործակցության հարցերը.

2) համակարգում է գիտական թեմաներով կատարվող աշխատանքները.

3) քննարկում և հրատարակության է երաշխավորում Կենտրոնի աշխատողների ու տվյալ մասնագիտությամբ այլ կազմակերպություններում աշխատող հեղինակների պլանային և արտապլանային մենագրությունները, ժողովածուները և այլն.

4) առնվազն տարեկան մեկ անգամ քննարկում և հաստատում է տնօրենի և գիտական ստորաբաժանումների ղեկավարների հաշվետվություններն ու առաջարկությունները Կենտրոնի գիտական գործունեության վերաբերյալ.

5) քննարկում է գիտության զարգացման հրատապ հիմնահարցեր, լսում գիտական հաղորդումներ.

6) նշանակալի գիտական աշխատանքները, գյուտերն ու հայտնագործություններն առաջադրում է պարզևատրման, Կենտրոնի գիտնականներին ներկայացնում է գիտական կոչումների շնորհման ու առաջադրում ընտրել ակադեմիայի կազմում.

7) հաստատում է գիտական աշխատողների ատեստավորման արդյունքները:

33. Կենտրոնի գիտահետազոտական ստորաբաժանումների ղեկավարներն ընտրվում են Կենտրոնի գիտական խորհրդի կողմից՝ հինգ տարի ժամկետով: Մամուլում և զանգվածային լրատվության այլ միջոցներով ընտրությունների պայմանների և ժամկետի մասին մեկ ամիս առաջ տրվում է հայտարարություն:

34. Կենտրոնի գիտահետազոտական ստորաբաժանումների ղեկավարների թեկնածուների առաջադրման համար փաստաթղթերը ներկայացվում են Կենտրոնի գիտական քարտուղարին: Գրանցվում են այն թեկնածուները, ովքեր գրավոր համաձայնություն են տալիս ընտրություններին մասնակցելու մասին:

35. Գիտահետազոտական համապատասխան ստորաբաժանման գիտական անձնակազմն իր ժողովում քննարկում է բոլոր գրանցված թեկնածությունները և փակ գաղտնի քվեարկությամբ, գիտական անձնակազմի անդամների առնվազն երկու երրորդի մասնակցությամբ, կարծիք է հայտնում յուրաքանչյուր թեկնածության վերաբերյալ: Քննարկման և քվեարկության արդյունքների մասին արձանագրությունը ներկայացվում է գիտական խորհուրդ:

36. Կենտրոնի գիտահետազոտական ստորաբաժանման ղեկավարի պաշտոնում ընտրվելու մասին որոշումն ընդունվում է գիտական խորհրդի կողմից՝ փակ գաղտնի քվեարկությամբ, մասնակիցների ձայների պարզ մեծամասնությամբ:

37. Եթե քվեարկության 1-ին փուլում ընտրությունը չի կայանում, անցկացվում է քվեարկության 2-րդ փուլ: Եթե քվեարկության 2-րդ փուլի ընթացքում նույնպես ընտրությունը չի կայանում, ապա Կենտրոնի տնօրենն ընդունում է որոշում գիտահետազոտական ստորաբաժանման ղեկավարի պաշտոնակատարի նշանակման (2 տարի ժամկետով) մասին, և անցկացվում է նոր ընտրություն:

38. Ակադեմիայի անդամներին գիտահետազոտական ստորաբաժանումների ղեկավարների պաշտոններում նշանակում է Կենտրոնի տնօրենը՝ 5 տարի ժամկետով, առանց մրցույթի և ընտրությունների:

#### IV. ԿԵՆՏՐՈՆԻ ԳՈՒՅՔԸ ԵՎ ՏԻՆԱՆՍԱԿԱՆ ՄԻՋՈՑՆԵՐԸ

39. Կենտրոնի սեփականությունը ձևավորվում է Կենտրոնի հիմնադրման ժամանակ և հետագայում հիմնադրի կողմից սեփականության իրավունքով նրան հանձնվող, ինչպես նաև Կենտրոն գործունեության ընթացքում ձեռքբերված գույքից:

40. Կենտրոնն իրավունք ունի օրենքին, հիմնադրի որոշումներին և (կամ) սույն կանոնադրությանը համապատասխան՝ իր հայեցողությամբ տիրապետելու, տնօրինելու և օգտագործելու սեփականության իրավունքով իրեն պատկանող գույքը:

41. Հիմնադիրը Կենտրոնին սեփականության իրավունքով պատկանող գույքի նկատմամբ չունի իրավունքներ՝ բացառությամբ Կենտրոնի լուծարումից հետո մնացած գույքի:

42. Կենտրոնի սեփականության պահպանման հոգսը կրում է Կենտրոնը:

43. Կենտրոնի սեփականության վրա կարող է տարածվել բռնագանձում՝ միայն դատական կարգով:

44. Կենտրոնի ֆինանսական հաշվետվությունների արժանահավաստությունը ենթակա է վերստուգման (աուդիտի)՝ ակադեմիայի կողմից ընտրված անկախ աուդիտորական կազմակերպության կողմից:

45. Կենտրոնի ֆինանսական միջոցները ձևավորվում են՝

1) Հայաստանի Հանրապետության պետական բյուջեից.

2) Կենտրոնի ձեռնարկատիրական գործունեությունից ստացված եկամուտներից.

3) հանրապետության և արտերկրի իրավաբանական և ֆիզիկական անձանց հետ պայմանագրային աշխատանքներից.

4) իրավաբանական և ֆիզիկական անձանց (այդ թվում՝ արտերկրի) նվիրատվություններից, դրամաշնորհներից, ինչպես նաև կտակներից.

5) Կենտրոնի գույքից և գույքային իրավունքից ստացված եկամուտներից.

6) Հայաստանի Հանրապետության օրենսդրությանը չհակասող այլ միջոցներից:

#### V. ԿԵՆՏՐՈՆԻ ՎԵՐԱԿԱԶՄԱԿԵՐՊՈՒՄԸ ԵՎ ԼՈՒԾԱՐՈՒՄԸ

46. Կենտրոնը կարող է վերակազմակերպվել կամ լուծարվել հիմնադրի որոշմամբ, Հայաստանի Հանրապետության քաղաքացիական օրենսգրքով սահմանված կարգով:

47. Կենտրոնը կարող է վերակազմակերպվել 100 տոկոս պետական մասնակցությամբ ընկերության կամ հիմնադրամի, ինչպես նաև համայնքային ոչ առևտրային կազմակերպության:

48. Կենտրոնը դատական կարգով կարող է վերակազմակերպվել կամ լուծարվել՝ միայն օրենքով սահմանված դեպքերում և կարգով:

49. Կենտրոնի լուծարման դեպքում Կենտրոնի պարտատերերի պահանջների բավարարումից հետո մնացած գույքն ուղղվում է Հայաստանի Հանրապետության պետական բյուջե: